

和
𩇛
𩇛
𩇛
𩇛
𩇛

吹萬樓文集卷十

金山高 變時若

贈何茂如旅長由松江移任上海序

代

自世道衰而人皆以詐僞相尙其始常發於黠者强者之一人而人能受其欺也於是相率以黠者爲之師而欺人之術日益甚卒之其欺益甚而其售益難蓋我能欺人而人亦能欺我而欺之之術乃窮也爲儒之說者曰仁義焉曰道德焉而豈知所謂仁義與道德者何物乎爲官之說者曰國利焉曰民福焉而豈知所謂國利與民福者何物乎爲民之說者曰視人如己焉曰大公無私焉而豈知所謂視人如己與大

公無私者何物乎聖賢其面目而盜賊其心胸其外爲鳳麟而其內爲魑魅則詐僞之習之遍於國中也久矣然則挽之道當如之何夫亦曰誠而已矣天下之事惟拙乃能勝詐惟樸乃能勝僞是故一誠可以動三軍一誠可以格萬類梗塞也而一誠可以通機巧也而一誠可以破誠之爲道其神明者哉旅長平陰何茂如先生以民國二年秋由甯率師來駐松江時亂事初平軍民之間交相疑忌先生至卽集官與紳與商而告之曰凡事無論大小往往因隔膜而生意見因意見而生衝突苟能相見以誠防微杜漸烏有疑忌之慮哉是吾與君等之責也吾姿質甚驚下然自十七歲從軍以來

治兵二十餘年奔走數千餘里所至之處從無惡聲者蓋吾之所恃祇一誠字耳嗚呼先生之自述所歷殆得其道矣乎蓋吾松蚩蚩之氓之遽能消除其疑忌之心而泯然於南北之見者其由於先生至誠相感之功爲不少也我聞先生當光復時在漢口漢陽督戰迭著勲勞南京之戰尤出奇制勝乃及親其人則溫溫若無能者其任事也每黎明起必分往各團營於保國保民之故申儆而講明莫不剴切詳盡聽者爲之動容其御下也每微服出巡見有軍人違法之舉輒痛加懲創然或遇兵士有受傷疾病者則又必親自慰問料理湯藥受者至於感泣故屬吏下卒咸畏之若嚴師而愛之若

慈母焉先生駐松二年情意周浹余時與接談韓刀褶袴間
若忘其爲軍人也者今將移任上海邦人士聞之咸有依戀
可憐之色余乃推本至誠之效以證諸先生之言更以先生
用誠之親得諸聞見者述之以附於贈言之義於以見至誠
至樸之道實足以治兵足以化民成俗而有餘者也民國四
年七月

顧復齋先生七秩雙慶序

天下難得之日每久處而若忘不及之境則相形而始見然後知親年之可貴惟有大福者乃克長享其樂也今年六月三日爲我外舅顧太史復齋先生七秩誕辰外姑陸宜人亦年七十四矣先生以道德文章羣推碩果巍然二老並臻大年於是親戚皆謀致其禱祝之誼而先生曰余生旬有一日而母逝泊乎就傳遂作鮮民故余生之日非可賀之日也堅不許閉門焉變以長者命不敢違乃往未稱慶而退則不覺聆先生之言觸我感也憶自光緒戊戌娶我妻兩家婚嫁皆居季時變已失怙三年而我妻庭闈皆康健每歸甯則見其

與兄姊四五人更迭娛侍和怡一堂輒自私歎永夜寒燈喁喁相語未嘗不羨我妻也然我母素慈惠朝夕暱就常至移晷自以爲天倫之樂以視我妻雖曰有間誠不多遜乃不數年而此樂竟不可得惟我妻獨膺其盛焉則因而益羨我妻夫家庭可娛之事往往習焉不察耳先生年登古稀髮已禿鬚盡白矣而精神不少減宜人患病久至不良於行然一室危坐神明湛然今則顏日童貌日加豐皆可卜遐齡之未艾妻兄荃孫少受庭訓於讀書娛親之外事無鉅細悉可不問殆天下之至樂也吾聞先生垂髫孤露而持家接物已若成人年十六應童子試學使李公筱湖見先生文大奇之遂以

第一人入泮先生自少卽喜爲古文辭博覽諸史兼治先儒義理書故自舉孝廉成進士入詞林皆有聲於時荃孫以通敏之資一秉家學爲文亦充然有根柢而孩提爛漫之眞發於天性此所謂得天獨厚宜其多福者耶而受之者或忘之惟他人視焉則以爲雖神仙不能易矣人生所處之境其相去何其遠哉至若先生令蜀中以名儒爲循吏歷官三年政聲卓著去蜀後民爲立清德碑以誌謳思辭官歸田卽堅臥不出曩年朝廷開經濟特科大吏以先生薦力辭不就嘗書東坡語曰北牖已安陶令榻西風幸免庾公塵可以見先生之志矣先生早年常授徒於外宜人綜理家政無劇易必躬

先生家貧宜人嘗質奩以助公車之費其後先生家居宜人則事雖至微必關白而後行非知禮者安能若是凡此先生與宜人之嘉行昭然在人耳目姑不詳述但述變所以私羨而不可得者以寄荃孫俾於殯子承歡時獻之卽以爲荃孫賀更晉爲長者壽焉倘亦先生及宜人所領而許之乎宣統二年庚戌六月高燮謹序

王海颿先生七旬雙壽序

余往歲遊武林得交丁君不識展庵昆季招飲於湖上之西泠印社集者數十人同攝一影其中年齒最尊者爲餘杭王海颿先生先生貌溫而學粹德盛而言謙鬚鬢蒼然而精神內斂與余始相識握手歡然若忘其爲年長以倍也者時先生館丁氏教授及於數世年已六十有八矣逮余歸自武林嘗集定盦句懷之所謂厚重虛懷見古風人才畢竟恃宗工真不啻爲先生詠也自是以後余每與丁君書必詢問先生安否而先生亦時時以詩文見示越歲之秋更寄所爲自述詩一百四十韻余讀之未嘗不想見先生豪興不減曩時云

近得丁君展庵書言今年二月二日實爲先生初度之辰德配魏夫人與先生齊年壽皆七秩矣以變辱先生引爲道義文字之交命獻一言以祝難老竊維古之壽者蓋有道焉必其能致力於敬恪和易之常使真誠不外溢則天旣全而壽自永固非專習導引服食丹砂者所得而知之也先生以家世名儒課徒自給窮年矻矻學行卓然清光緒間嘗佐沈叔湄文宗衡文於閩繼應徐季和文宗之聘爲臨川願學堂山長鼓勵士氣不遺餘力後隨樊介軒提學校試江蘇退而復任教授自民國以來長君渡出爲昌化縣知事次亦各就省中校學務而先生誨人不倦儉約而亨吟詠蕭然老而彌健

其家人請盍少舒先生則曰爲人宜惜分陰我藉以自課也
嗚呼此所謂有道者也此先生之所以克臻大年也抑我聞
天柱之山道書稱爲五十七福地而茗溪之水潨洄激宕瀾
漫而無盡我遊武林而至西溪西溪地鄰餘杭境山脈幽邃
意去先生所居定復不遠我因以思先生山水區往來於
明湖茗溪間俯仰優游康甯好德殆所謂宜錫之福者耶他
日游屐所經更當叩長者之堂而侑一觴焉丁巳孟春金山
高燮拜序

丁母魏太夫人七秩壽序

杭州丁氏以藏書之富著稱於世當時最負重望者有竹舟松生兩先生文獻東南網羅殆盡卽世所稱八千卷樓者是也余生也晚不獲見兩先生歲乙卯遊杭州而識竹舟先生之孫三在以布二君皆樸素工詩一見如舊卽導遊西溪之風木庵風木庵者兩先生廬墓之所距庵里許地爲梅花泉有塚焉則兩君先人修甫先生之詩塚也余心識之兩君更爲余言修甫先生有遺詩名小槐簪稿今藏於家尙未付梓余因以知兩君之詩學類皆得諸當日趨庭之訓其代有傳人宜也近得盛先生鳳翔王先生海颿等寄其所爲丁母魏

太夫人徵文啟讀之而知兩君之所學固不特有得於庭訓而已其太夫人亦賢明耽吟詠丹鉛不去手當修甫先生在時伉儷之間唱酬無虛日太夫人生丈夫子六幼年修甫先生館京師太夫人以一身兼父師職日課之暇更授以唐人詩必至成誦乃已然後歎詩書之澤積之深而流之遠文學彬彬一門風雅固非可以幸致者矣今年十一月二十一日爲太夫人七秩設帨之辰令子上左昆仲謀所以稱觴上壽以博親歡而屬一言於余余維太夫人年屆古稀神明強固詩禮淑德遠近所宗惟子若孫多才濟濟今三在雖不幸早世而有子曰鉅亦年少能詩克承家學文獻之傳正未有艾

太夫人顧之亦可以殺其哀思矣嘗攷西湖名蹟自粵難以
後多爲丁氏所興葺數十年來已漸就荒廢自入民國湖山
氣象又迴乎不侔矣太夫人以道韞之才華享少君之壽考
頤養天和優游俯仰我知此後春秋佳日有攜其子與猶子
奉板輿而爲綵衣之舞於六橋三竺間者非他人必上左昆
仲侍太夫人遊也湖上南山有煙霞洞修甫先生在時嘗手
逐其向塑之錢神而易以東坡像風雅之士多快之太夫人
遊此其亦可以興懷而賦詩矣共和六年歲在彊圉大荒落
辜月金山高燮拜序

